

Bonkand'onda Paulo ele asi Epheso

Tshapita 1

1 Paulo, ekima enda Yeso Kilisito, ma esangedya ena Nkumundjeyi ele bakilami, asi dikotomedya nda Kilisito Yeso bale nda Epheso. 2 diyota dinda iphepha diyali el'inyo o la wee m'ele Nkumundjeyi, Apha endiso la m'ele Nkumu Yeso Kilisito.

3 Dimemya diyali ele Nkumundjeyi, Ishe ena Nkumu endiso Yeso Kilisito, ondotonyaki insonyi iumela ina Nyuma nda itetenyi inda loola ele Kilisito; 4 sh'eki andi atosonaka el'andi nd'oso onda etongelo ena motshi, inda isho diyala basi ekila, bapha la lophedi nd'oso onandi nda diyota: 5 la andi otosonaki nd'ososo inda isho diyala bakitshwa banandi munge, ban 'anandi band' ele na mpamba enda Yeso Kilisito, shene eki esangedya enandi munge, 6 inda ditombya inda diyota dinandi dimemyami, dikiandi atambaka nda iyedi inda bolangami bonandi: 7 l'andi otoshikolaki la bolongo bonandi: otophophedyaki bembe bendiso la bokakaya bonda diyota dinandi; 8 dikiandi alekolaka diphudya ed'isho la mpima la weyi. 9 Ko andi ototshumyaki djoi inda esangedya enandi endishimaki, sh'eki andi asangedyaka nda botema bonandi munge, 10 dinda dikokya esuka enda dikeki, la dinda dikamya baoi bauma ele Kilisito, o la baiko bale nda loola, o la baiko bale na motshi; 11 ko isho tokita bokitshwa el'andi sh'eki andi atosonaka nd'ososo nda iyedi inda esangedya enandi, and'iko diyadi dikelaka baoi baumela nko sh'eki andi akanedyaka nda esangedya enandi munge, 12 inda isho diyala dimemya dinda ditombya inandi, isho bane animedyaki Kilisito nd'oso: 13 o la inyo onimedyaki akinyo wokaka botephelo bonda soosolo, bosako bond'olotshi bonda yika eninyo; la akinyo wimedyaka inyo lolamba nimba ena Nyuma end'Olotshi ekiandi alakaka. 14 Eko eyadi botshuku bonda bokitshw'ondiso elengi ndi boshikolelo bonda baumba baauma akiandi wataka inda ditombya dinandi dimemyami.

15 Sheko, o la emi, akimi wokaka bosako bonda yimedyaka eninyo ele Nkumu Yeso, o la lolango loninyo londokinyo bakilami baumela, 16 mpolemwe yuteya elunga nda boloko boninyo, nda dilotangola andotsh'emi, 17 dina Ndjambi ena Nkumu endiso Yeso Kilisito, Ishe enda ditombya alokayi betema bena mpima la benda wenyelo nda weyi bonandi; 18 dinda baisho banda betem' eninyo badipholami, dinda inyo diphokwa dilindedya dinda etelo enandi, o la bayonga banandi banda ditombya dinda bokitshwa bonandi nd'atei anda bakilami, 19 o la mpamba enandi elekola bonene ele isho banimedyaka, shene eyadi bokambelo bona

onene bonda bokemba onandi, bokiandi akambaka ele Kilisito nda yoetola m'atei anda bawaki; la andi aoluuledya nda lo lonandi londa dwele nda ditetenyi dinda loola 21 nd'adiko banda bakulaki bauma, la mpipho iuma, la bankumu bauma, la baina bauma beya ditangolama, apha nda ekeki ene entulu, ayi o la ekeki ekoyala; 22 la andi okitedyaki djomba dinkumela bya n'ase anda bekolo benandi, aoloila botsha bonda djomba diuma ele Ekelezia, 23 eko eyadi djongi dinandi, elodyamelo ena one ondoyadi dilodyaka baoi baumela nd'atei anda bya.

Tshapita 2

1 O la inyo, akinyo bas' ewedi nda diphedya dininyo la bembe beninyo, 2 akinyo akendaka l'eko nda iyedi inda lokendo lona motshi ine, shen'elanga nkolo ya mpamba enda lompompo, bodimo ondokamba nda betema benda basi diphedya nda ekeki ene: 3 tokimanaki la iyo isho bauma nd'ososo, nda dilula inda djongi dindiso, nda dikela shene eki bounu la nkanedya asangedyaka dikela, la isho toki bana ana nkele ma yotshwa endiso, phe nko aki bankina; 4 ayi, Nkumundjeyi, nda diyonga dinandi dinda lokesedi, la djoji dinda lolango lonandi londa bonene lokiandi atolangaka, 5 (akiso wetamaka nda bewedi nda bembe bendiso) andi otetolaki, isho la Kilito eteny' ephoko, (lombikyama nda diyota dinda diphepha), 6 la andi otuledyaki etenyi ephoko l' andi, otetshaki etenyi ephoko l' andi nda ditetenyi dinda loola ele Kilisito Yeso, 7 ditshina dina andi yishola bayonga balekola banda diyota dinandi la bokapha bonandi ele isho nda Kilisito Yeso. 8 Boloko bonda inyo lolikyama ma diyota dinandi dinda diphepha, apha m'ele inyo mele, aye la bokakaya m'ele Nkumundjeyi; 9 apha ma bekeledi beninyo, bonto atophyaphetaki. 10 Boloko bonda toyadi bolimo bonandi, totongama ele Kilisito Yeso dinda isho dikela baoi banda bolotshi baki Nkumundjeyi atophongelaka nd'oso dinda isho tokendi l' ako.

11 Sheko lophwaka mbo, Inyo loki basi enanga nd'oso, nda bounu, ko inyo loletama mbo, Batotena bonsonso m'ele baiko baoletama mbo, Batena bonsonso, etenelo eiko ekelamaki nda djongi la bakata. 12 Ko lophwaka mbo, Nda betsho besoko inyo lotoki la Kilisito, loki o basi enanga n'andja banda waphemelo bonda basi Isalele, la inyo loki baphaya ma esambi enda dilaka. Inyo lotoki la dilindedya, lotoki la Ndjambi nda bokidi. 13 Aye, etambene, inyo ane bandulamaki etali m'ele Kilisito Yeso, lomboyotshutshama nda bolongo bonda Kilisito. 14 Djoji ina andi ayadi wee bondiso, otokomanyaki nko bophoko, aotshangola etshutshu enda ikandu eyaki nd'atei bandiso. 15 Andi aolimola bosudu la djongi dinandi,

iyedi diko inda dingembe dikiso akekemyamaka, boloko bonda ditonga, andi o munge, bonto bophoko bond'oto, m'ele iyo bak'aphe, dinda yanga wangelo bonda wee. 16 La djoji inda yaekesanya nda djongi diphoko ele Nkumundjeyi na mpamba enda bosongo bona ndekesanya mpene ekiandi wimolaka bosudu; 17 la andi oyakaki nda dilosambedyo bosako bonda bolotshi bonda wee ele inyo boiko boyaki etali, la dinda yasambedyo bosako bonda bolotshi bonda wee baiko bandoyaki ntutama. 18 Nd'oloko onda ele andi isho baphe teya ditutama ele Apha na Nyuma ephoko. 19 Sheko, inyo lophoyadi baphaya nkina basi benanga, ayi loyadi basi bongidi bophoko la bakilami, la basi diyotshi dina Nkumundjeyi. 20 Inyo lomboshumyama nd'adiko anda ditshina dinda dikima la basangi; Yeso Kilisito andi o mele ayadi diyoko dinda bonene dinda ikoto. 21 Eshumyelo bya ekakatala etenyi ephoko el'andi, emboshumyama dinda diyala botombolelo bonda ekila ele Nkumu. 22 Lomboshumyama o la inyo etenyi ephoko la andi dinda diyala wulamelo bona Nkumundjeyi ele Nyuma.

Tshapita 3

1 Nda boloko bone, emi Paulo, bolebami bonda Yeso Kilisito djoji ina inyo basi enanga: 2 nkina inyo lomboka bosako bonda bolimo bonda diyota dinda diphepha dina Ndjambi dikiyo ankaaka la boloko oninyo, 3 sh'eki iyo antshumyaka djoji inda ishimo (phe nko ekimi alokotelaka ekotelo enda ishishi nd'oso; 4 andalolalom'inyo diko, inyo lokokophola weyi bonami bonda djoji inda ishimo inda Kilisito). 5 Djoji diko diteyami ele bana ban'anto na ndjotshwelo inkina shene iko imbisholama etambene ele dikima dinandi la basangi banandi banda ekila na mpamba ena Nyuma, mbo, 6 Basi benanga bale bakitshwa etenyi ephoko, o la djongi etenyi ephoko, o la yambi etenyi ephoko enda itangya inandi ele Kilisito Yeso nda bosako bond'olotshi. 7 Emi ndoyala bonkambi bond'oko nda iyedi inda diyota dinda diphepha dina Nkumundjeyi dikimi wambaka sh'eki bokambelo bonda bokemba bonandi. 8 Emi one, ndolekola bakilami bauma ditshila, baonkaya o la emi diyota dine dinda diphepha dina emi ditshangola bosako bond'olotshi bonda bayonga bapheyani banda Kilisito nd'atei anda basi benanga, 9 o la dina emi dikophodya banto bauma shen' eyadi bokambelo onda djoji inda ishimo; diko dilishama nda ekeki la ekeki nda botema bona Nkumundjeyi ondotongaki djomba diuma nda ditshina dinda yishola etambene ele bakulaki la bankumu nda ditetenyi dinda loola, mpima ena Nkumundjeyi, yophu la yophu, nd'atei anda Ekelezia, 11 shene eki esangedya enandi enda botshwako ekiandi asangedyaka ele Kilisito, Nkumu endiso. 12 Isho toyadi la ntepho ele andi enda ditutama la

bokemba bonda yimedya ele andi. 13 Sesoko, nsholoonda mbo, Lotolembaki la boloko bona nshingi inami iloshingelemi; iko iyadi dimemya dininyo. 14 Nda bolok'one ndoshumy' aongo ele Ishe ena Nkumu endiso, Yeso Kilisito. 15 Ndjotshwelo inkumela inda loola o la motshi imbolama baina phe nko m'ele andi, 16 totsha mbo, Kilisito ulami nda betema beninyo nda yimedya, ina inyo diyala la bedju, la dikembyama nda diyota, 18 nda bolok'ona inyo dilambitodya, inyo la bakilami bauma shene eyadi kekei, la botali, la bongunda la wemalaka; 19 o la inyo yeya lolango londa Kilisito lolekola weyi; ina inyo dilodyama nda elodyamelolo ena Nkumundjeyi. 20 Ko, ele one ondeya dikela baoui balekola baiko bandotshisho la bandokanedyisho, nda iyedi inda bokembyelo boyadi dikambaka nda betema bendiso, 21 dimemya diyali el'andi nd'atei anda Ekelezia, m'ele Kilisito Yeso, nd'atei ana ndjotshwelo inkumela, diiyo la diiyo. Apha o sesoko!

Tshapita 4

1 Emi, osi lonkandju lona Nkumu, nsholoonda mbo, Lokendaka nda bekeledi bekomana la yeta ekinyo wetamaka, 2 la diyakitedya la etshukumadi bya, la ditshidi; lokesanaka la diyota; 3 lophongaka ditomanya ekamyelo ena Nyuma la dimama dinda wee. 4 Djongi diyadi diphoko la Nyuma eyadi ephoko, shene ekinyo wetamaka la dilindedya diphoko inda yeta eninyo; 5 Nkumu ephoko, yimedya ephoko, mbatisa ephoko; 6 Ndjambi ephoko, ondoyadi Ishe enda bya, ayadi nd'adiko anda bya, ale nda bya, ayadi nd'atei anda bya. 7 Aye tolamba diyota dinda iphepha, bonto l'onto, shen'eyadi iyedi inda bokakaya onda Kilisito. Sheko andi aosanga ayandi, Akiandi wuulelaka nd'adiko andi otondodyaki bolomba bonda bakwala, aokaya banto bekakaya. 9 Koko, djoi dine mbo, Andi aolulela nd'adiko, diko diphotoshumye mbo, Andi iko ondokitelaki nda ditetenyi din'ase ana motshi? 10 Boiko ondokitelaki ayadi phe nko one ondulelaki etali nd'adiko ana ndjola inkumela dinda dilodya djomba diuma. 11 Andi aokaya bamodi anda diyala dikima, bamodi basangi, bamodi bandaki banda bosako bond'olotshi, bamodi batomanyi la baekyi, 12 djoi inda dikomanya bakilami, dinda iyo yeya ditana bankina, dinda dishumya djongi dinda Kilisito, 13 elengi ndi akundjwalomisho bankumela la yimedya ephoko entulu, nda weyi bona Bon'ona Nkumundjeyi, o shen'ama dwele, nda iyedi inda wemalaka bonda bomaka bonda Kilisito; 14 nda ditshina inda isho tophotshikali bana mpou, tophophukyami la lompompo bya londa wekyelo boyadi m'atshuya bana anto la bakutshi bandiyo banda yungusanya bankina. 15 Aye tokati eko

eyadi soosolo la mposa enda isho yola nda baoi baumela ele Kilisito, ondoyadi botsha. 16 Bokupha bonda djongi bolongama m'ele andi, bomamana etenyi ephoko, ko bompudi la bompudi oyadi ikambaka nda iyedi ind' oko, dinda yodya djongi, dinda diko diyashumya nda lolango.

17 Nshosanga botephelo bone shene, ko nsholotshumya djoi dine nd'oso ona Nkumu mbo, Lambyaka dikenda shene esembi basi benanga ankina, nda tshwayayi tonda betema endiyo. 18 Nkanedya indiyo iyoyala nda widima, baolamwa ma lomo lona Nkumundjeyi bolok'onda wephepho bondiyo boyadi ele iyo djoi inda boolo bonda betema bendiyo. 19 Baolimola lokesedi ma betema bendiyo, baoyalesa nda baoi bana nsonyi nda dikela bekeledi bena mindu la dilula dipholemvwe.

20 Aye inyo loteki djoi inda Kilisito shene, 21 nkina inyo lolooka la lolekyama m'ele andi nda iyedi inda baoi banda soosolo, bayadi ele Yeso.

22 Limolaka bekeledi bekinyo beki oso bena bonto boiko bonda elengelengi, bondoyadi diyaphitaka la baoi banda batshuya banda dilula.

23 Lomboyala la nkanedya ind'oto na mpima ininyo. 24 Lolotaka bonto bond'oto, bondotongamaki la bolotshi o la ekila eenda soosolo nda iyedi diko ilanga Nkumundjeyi.

25 Sheko, limolaka ditephela bophoto, losangelanaka baoi banda soosolo, bonto la wina bonandi, la bolok'onda toyadi tompudi tonda djongi diphoko, bonto l'onto. 26 We woka nkele, tokelaki bombe; phongaka wina botilaki nd'atei ana nkele endawe. 27 Lotokaaki diabololo djowa. 28 Bonto bondiyaki djomba, ambyaki yiya, aye akambi bolimo, akeli baoi banda bolotshi la bakata banandi inda yaya djomba dinda dikaya one onelengana.

29 Lotimediyaki lolaka lona nsonyi yola ma berumvu beninyo, phe nko betephelo benda bolotshi beya yodya banto shenda elengana iyo, dinda ditana basoko bandoka la baoi banda diyota. 30 Lotodyalengyaki Nyuma end'Olotshi ena Ndjambi, ekinyo wambaka dilimbitelo elengi ndi wina bonda eshikolelo. 31 Bompele bya, la bosudu, la nkele, la lophoso, la dilephola bamamwaki m'ele inyo la bomolongo bya. 32 Lookanaka ishei, loyalaka la lokesedi, lophophedyanaka bembe shene eki Ndjambi alophophedyaka djoi inda Kilisito.

Tshapita 5

1 Sheko, lookolaka Ndjambi shenda bana anandi banda lolango. 2 Lokendaka nda lolango shene eki Kilisito atolangaka; andi oyalesaki djoi indiso, bokakaya la bolambo ele Nkumundjeyi bonda bokenge bond' ototshi.

3 Aye bokelo, la baoi bana mindu baumela, la dilula diphokindi,

batotangolamaki nd'atei aninyo, shene ekomana la bakilami; 4 o la baoi bana nsonyi, la iyephephe nkina iyele; bako baphokomani; ko aolekola bolotshi yuteya elunga. 5 Djoyi inda inyo yeyaka soosolo mbo, Boiko bokitsha mposa, nkina bosu mindu, nkina bonto la dilula diphokindi, bondoyadi bomemyi bonda bete, bapha la bokitshwa nda waphemelo bonda Kilisito la Ndjambi. 6 Lophongaka bonto atolotshuyaki la baoi ana mpampa, boloko ona nkele ena Ndjambi ekoyaka ele bana banda diphedya la bolok'onda baoi baiko. 7 Sheko lotekesanaki la iyo. 8 Djoyi inda nd'ososo inyo loki widima, ayi etambene loyadi iyani ele Nkumu. Lokendaka shenda bana banda iyani. 9 (Djoyi ina mamu inda iyani iyadi bolotshi bya la bonanwa la soosolo). 10 Lophongaka diyala l' aoi baokoshashadya Nkumu 11 Lotekesanaki la bekeledi benda widima, bephotshwe mamu; ayi lolekolaka yishol' eko. 12 Djoyi inda diyadi nsonyi nkula disanga baoi bakela iyo nda ishimo. 13 Ko baoi baumela baolisholama phololo shene eyadi bako, boloko onda iyani iyadi wisholaka baoi baumela. 14 Sesoko andi aosanga ayandi, Etshwaka, we bonto etsha ilo, etshwaka m'atei anda bawaki, la Kilisito aokokophetela. 15 Sheko lephwaka shene ekenda inyo, apha shen' anto basamba wanya, aye shenda basi mpima. 16 Loyaphongelaka djowa, djoyi inda betsho beyadi bembe. 17 Nda ditshina dine, lotoyalaki tshwetetshi, ayilokandjwaka esangedya ena Nkumu. 18 Lotowaki la baana; bako bayadi diphitaka mpima; ayi lolodyamaka la Nyuma. 19 Lotephelanaka la nyembo la ikiya la totokya tona Nyuma; lembaka, lomemyaka Nkumu ma betema beninyo. 20 Luteyaka elunga betsho beumela ele one ayadi Ndjambi o la Apha, nda dina ina Nkumu endiso Yeso Kilisito. 21 Lomemyanaka bonto l'onto nda bophodu onda Kilisito.

22 Baadi, lomemyaka balomi baninyo munge, shene ele Nkumu, 23 djoyi inda bolomi boyadi botsha onda wadi bonandi, shene eyadi Kilisito botsha bonda Ekelezia, la andi mele ayadi Bosukako bonda djongi. 24 Ko shene eyadi Ekelezia dikitelaka Kilisito, baadi bakiteli balomi bandiyo o ngaiko la baoi bankumela. 25 Balomi, lookaka baadi baninyo munge lolango, shene eki Kilisito alangaka Ekelezia, la andi oyalesaki djoyi inda eko, 26 la boloko onda yophetola la ekelo enda bashi la djoyi dinandi, 27 la esangya enda diyakaya Ekelezia enda ditombya, epha la bulo nkina bomoko, nkina emba enkina enda shene; aye inda eko eyali phitoo, epha la mbalaka. 28 O sheko diyadi la balomi yoka baadi bandiyo lolango shene elanga iyo baongi bandiyo munge: dwele ondolanga wadi bonandi ayadi diyalangaka. 29 Djoyi inda lako onto ondoyadi ditonaka djongi dinandi munge, aye andi yoleshaka la yesanyak' iko o shenda Kilisito la Ekelezia. 30 Boloko onda

toyadi tompudi tonda djongi dinandi; (toyadi ma bounu bonandi la ma yeshi enandi). 31 Nda ditshina dine dwele aokotshika ishe la nyango, aokomamana la wadi bonandi, la iyo ak'aphe baokoyala djongi iphoko. 32 Djoï dine diyadi wishishi bona onene, ko emi nshotephela djoï inda Kilisito la Ekelezia. 33 Aye o la inyo, bonto l'onto alangi wadi bonandi shene eyalangandi; la wadi amemyi bolomi bonandi.

Tshapita 6

1 Bana, lambodyaka baoi anda baotshi aninyo ele Nkumu, djoï inda shene elongama bolotshi. 2 Memyaka isho la nyongo eyadi engembe end'oso eyadi la ilaka nkoko; 3 inda we yaya nkondjo la yulama mandele nda bokidi. 4 Ko inyo baishe, lotookyaki bana baninyo nkele, ayi longolaka iyo la alaka bana Nkumu la yekyelo enandi.

5 Inyo bantamba, lambodyaka baoi anda bankolo aninyo banda baongi, la bophodu la dilenga, la botema bonda soosolo shene ele Nkumu; 6 lotokambaki phe nko nda baisho ban' anto shenda bashashadyi ban'anto, ayi shenda bantamba banda Kilisito; lokelaka esangedya ena Nkumundjeyi ma botema; 7 lokambaka la botema ophoko shene ekambela bonto Nkumu, apha ele banto. 8 Leyaka mbo, Nkina bontamba nkina boyakimedi, akelalomi andi bolotshi, aokambalomi phyophyo m'ele Nkumu. 9 Ko inyo bankolo, lakelaka o phyophyo, lambyaka wanelo, lophwaka mbo, Nkumu endiyo o la eninyo ayadi nda loola, la andi apha la lwato.

10 Bana band' Apha, djoï inda esuka dine, mbo, Lokembaka ele Nkumu la nd'ekembyelo ena mpamba enandi. 11 Lolotaka elotelo ena Nkumundjeyi inda inyo yeya dikoka diyasombedyà nd'atei anda bakutshi anda diabulu. 12 La boloko onda boshela bondiso bopha la bounu la bolongo, ayi toshidiyana la bakulaki la bampipho, o la yaphemedi banda widima bone, la mpamba enda baphopho ban'embe nda ditetenyi dinda loola. 13 Sheko, lolotaka elotelo euma enda boshela ena Nkumundjeyi, ina inyo ditshidingana nd'atei anda wina bonda bombe, la yeya yemala akokyalominyo baoi baiko baumela. 14 Shene, lokakatalaka, lolotaka baoi anda soosolo nda benkeki beninyo, lembaka elotelo enda baoi ana nwaa nda bonkoko. 15 Lolotaka ephongelo enda bosako bonda bolotshi nda bekolo beninyo. 16Nd'adiko banda djomba dine, lolotaka nguwa enda yimedyà, eko yeyaka diphophya bakphula banda teya bana nkolo y' ombe. 17 Lokolaka o la disuku dinda yika nda botsha, la isandja ina Nyuma, iko iyadi botephelo bona Nkumundjeyi. 18 Loondaka nda dikeki diumela la yotsha bya la yoonda bya na Nyuma. Lophongaka yophwa djoï ine mbo,

Lootshelaka bakilami bauma. 19 Londootsheli o l'emi, ina emi yeya dipholadya borumvu la ntepho, la yishola djoi ind'ishimo inda bosako bonda bolotshi. 20 Nda boloko one ndjadi bosokodyami, bolembamaki nda lonkandju, inda emi disambedyo djoi la ntepho shene diyadi l' emi ditephela.

21 Koko, djoi ina inyo yeya baio banami la shene ekela emi, Tukiko, wina ondiso bonda lolango, o la bonkambi bonda ditshidi bona Nkumu, aokolosangela baio baiko bya. 22 Mbolosokola ele inyo nda djoi dine menge, ina inyo yeya shene eyadi isho ane la inda dikembya betema beninyo.

23 Baio banda wee bayali ele bana band' Apha, la lolango londa yimedya m'ele Ndjambi Apha la m'ele Nkumu Yeso Kilisito. Diyota dinda diphepha diyali la baiko bauma bandoka Nkumu endiso Yeso Kilisito lolango londa soosolo.